

Puussianik tigummiartaatinik plastikkinik aammalu plastikkinik tunisassianik ataasiaannagassanik atuineq pillugu Namminersorlutik Oqartussaata nalunaarutaat

Avatangiisit innarlitsaaliorneqarnissaanik Inatsisartut inatsisaat nr. 9, 22. november 2011-meersumi § 10, imm. 1, nr. 1, 2, 7, aamma 20, § 40, imm. 3, nr. 3 aamma § 66, imm. 3, naapertorlugit aalajangersarneqarput:

Atuuffissaa

§ 1. Nalunaarut puussianut tigummiartaatinut plastikkinut aamma puussianut plastikkinik tunisassianut ataasiaannagassanut atuuppoq.

Nassuiaassutit

§ 2. Nalunaarummi matumani paasineqarpoq:

- 1) Plastikkit: atortussiat tassaasut polymer, taakkununga akuutissanik imaluunniit pinngoqqaatinik allanik akuutissalinnut, aammalu polymer-it pinngortitameersut, akuutissanik atuilluni allangorsarneqanngitsut eqqaassanngikkaanni, tunisassiani naammasseriikkani aaqqissugaanerani pingaarnertut akoorutitut atorineqarsinnaasut.
- 2) Puussiat tigummiartaatit plastikkit: puussiat tigummiartaatit tigummivillit imaluunniit tigummiveqanngitsut plastikkinik sanaajusut, nioqqutissanik imaluunniit tunisassianik tuniniaasarfinni atuisartunut tunniunneqartartut.
- 3) Puussiat tigummiartaatit plastikkit oqitsuaraaqqat: puussiat tigummiartaatit plastikkit 15 mikrometerinit saannerit, eqqiluisaarnissaq eqqarsaatigalugu pisariaqartut imaluunniit tamanna inuussutissanik maangaannartitsinissamik pitsaaliueqataassappat, inuussutissanut ataasiakkaartunut pingaarnertut poortuutitut atorineqartut.
- 4) Plastikkinik tunisassiat ataasiaannagassat: tunisassiaq tamakkiisumik ilaannaasumilluunniit plastikkinik sananeqaateqartoq, aammalu tunisassiortumut utertinneqartussatut imaluunniit atoqqinneqartussatut eqqarsaatigineqanngitsut, ilusilersugaanngitsut imaluunniit nittarsaanneqanngitsut.
- 5) Imerfiit: Imerfiit tassaatinneqarput tiitorfiit ataasiaannagassat, imeruusaatinik, soorlu imermik, juice-mik, kaffimik, tiimik aamma smoothies-inik il.il. ingerlaannaq imerneqartussanik tuniniaanermit imaluunniit akeqanngitsumik tunniussinermut atatillugu atorineqartartut.
- 6) Plastikkit oxo-nit arortinneqarsinnaasut: plastikkinik atortussiat, akuutissanik akoqartut aammalu

silaannaqalernerminni mikisuaraaranngorlutik plastikkit atorussiat aggornerannik malitseqarsinnaasut imaluunniit akuutissanik uumaatsunik arrortinneqarsinnaasut.

Puussiat tigummiartaatit

§ 3. Puussiat tigummiartaatit plastikkit tigummivillit 30 mikrometerit issussusillit sinnerlugilluunniit nioqqutissanik imaluunniit tunisassianik tuniniaavinni akeqanngitsumik tunniuteqqusaanngillat.

Imm. 2. Puussiat tigummiartaatit plastikkit tigummivillit 30 mikrometerinit saannerusut nioqqutissanik imaluunniit tunisassianik tuniniaasarfinni akeqanngitsumik imaluunniit akilersillugit tunniuteqqusaanngillat.

Imm. 3. Puussiat tigummiartaatit plastikkit tigummiveqanngitsut oqitsuaraaqqat 15 mikrometerinit saannerusut nioqqutissanik imaluunniit tunisassianik tuniniaasarfinni akeqanngitsumik imaluunniit akilimmik tunniuteqqusaanngillat.

Imm. 4. Puussiat tigummiartaatit plastikkit tigummiveqanngitsut oqitsuaraaqqat eqqiluisaarnissaq eqqarsaatigalugu atorineqarpata imaluunniit inuussutissanik asiutitsineq pinaveersaarneqarpata, taakkua inerteqquteqarnermi ilaatinneqanngillat, takuuk imm. 3.

Plastikkinit tunisassiat ataasiaannagassat

§ 4. Tunisassiat tamakkiisumik ilaannaasumilluunniit plastikkit, aammalu ataasiaannagassatut naatsorsuunneqartut inerteqqutaapput. Plastikkinik tunisassiat ataasiaannagassat makkua inerteqqutaapput aammalu tuniniarneqaaqusaanatik imaluunniit akeqanngitsumik tunniuteqqusaanatik:

- 1) Vapind-it.
- 2) Nerinermut atorussat (ajassaatit, saviit, alussaatit, nerrisit, alussaatit ajassaatitallit assigisaallu).
- 3) Puugutaasat.
- 4) Milluaatit.
- 5) Imeruersaatinut aalaassutit.
- 6) Amitsukujuut ballonngit aalajangernissaannut noqittulernissaannullu naatsorsuutigineqartut, ilanngullugit aalajangiinermut atorineqartartut allat.
- 7) Inuussutissanut poorineqartartut polystyren siammarlugu sanaajusut, tassa imaappoq inuussutissanut poorineqartartut matullit imaluunniit matoqanngitsut, soorlu:
 - a) Tuniniaasarfinni imaluunniit takeaway-imi ingerlaannaq nerinermut naatsorsuunneqartut.
 - b) Poorineqartumiit nerisassanut.
 - c) Annertunerusumik piareersaqqinnagu nerinissamut piareersimasut.
- 8) Imermut poorineqartartut polystyren siammarlugu sanaajusut, ilanngullugit taakkua simii matuulu.
- 9) Imerfiit polystyren siammarlugu sanaajusut, ilanngullugit taakkua simii matuulu.

Imm. 2. Vapind-it aamma milluaatit nakorsaatinut atorunut atorineqartartut inerteqquteqarnermi ilaatinneqanngillat, takuuk imm. 1, nr. 1 aamma 4.

§ 5. Tunisassiat plastikkinik oxo-nit arrortinneqarsinnaasunik sananeqaatillit inerteqqutaapput.

Nakkutilliineq

§ 6. Nalunaarummi matumani maleruagassat malinneqarnerannut kommunalbestyrelsi nakkutilliisuuvoq, aammalu maleruagassat atuutsinneqarnerannut pisariaqartunik peqqusissuteqarsinnaalluni inerteqquteqarsinnaallunilu.

Imm. 2. Nakkutilliinermut atuutsitsinermullu aammattaaq avatangiisit innarlitsaaliorneqarnissaanik Inatsisartut inatsisaanni kapitali 12-imi maleruagassat atuupput.

Pineqaatissiisarnermut aalajangersakkat

§ 7. Akiliisitaanertut ilusilimmik pineqaatissinneqarsinnaavoq:

- 1) § 3, imm. 1 malillugu puussianik tigummiartaatinik plastikkinik tigummivilinnik akeqanngitsumik tunniussisoq.
- 2) § 3, imm. 2 malillugu puussianik tigummiartaatinik plastikkinik tigummivilinnik akeqanngitsumik imaluunniit akilersillugit tuniniaasarfimmi tunniussisoq
- 3) § 3, imm. 3 malillugu puussianik tigummiartaatinik plastikkinik oqitsuaqqanik akeqanngitsumik tunniussisoq imaluunniit tunisisoq.
- 4) § 4, imm. 1 aamma § 5 malillugit inerteqquteqarnermik unioqqutitsisoq.
- 5) § 6, imm. 1 malillugu nakkutilliinermut, peqqusissuteqarnermut imaluunniit inerteqquteqarnermut pinaasertoq.

Atuutilerneranut aalajangersakkat

§ 8. Nalunaarut manna ulloq 1. novembari 2022 atuutilerpoq.

Namminersorlutik Oqartussat, ulloq 5. juuli 2022

Kalistat Lund

Nunalerinermut, Imminut Pilersornermut, Nukissiutitut Avatangiisinullu Naalakkersuisoq

/ Mette Skarregaard Pedersen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut